

हबक्कूक

हबक्कूक क परमेस्सर स सिकाइत

1 इ उ संदेस अहइ जउन हबक्कूक नबी क दीन्ह ग रहा। 2 हे यहोवा, मई लगातर तोहार दोहाइ देत रहत हउँ। तू मोर कब सुनव्या? मई इ हिंसा क बारे में तोहरे अगवा नरियात रहत हउँ मुला तू कछू नहीं किहा। 3 लोग लूट लेत हीं अउर दूसर लोगन क नोस्कान पहोंचावत हीं। लोग तहतुक करत हीं अउर झगड़त हीं। हे यहोवा! तू अइसी भयानक बातन मोका काहे देखोंवत अहा? 4 व्यवस्था बगैर सहारा क होइ चुकी अहइ अउर लोगन क संग निआव नहीं कइ पावति अहइ। दुट्ट लोग सज्जन लोगन क संग आपन लड़ाइयन जीतन बाटेन। तउ, व्यवस्था अब निस्पच्छ नहीं रहि गई बा।

हबक्कूक क परमेस्सर क जवाब

5 यहोवा जवाब दिहस, “दूसर जातियन क लखा। ओनका धियान स देखा। तू अचरज होइ जाब्या। मई तोहरी जिन्नगी क समइ में कछू अइसा करब जउन तोहका चकित कइ देइ। अगर तोहका ओकरे बारे में बतावा जाइ तउ तू ओह पइ भरोसा नहीं कइ पउब्या। 6 मई बाबुल क लोगन क एक ठु बलवान जाति बनाइ देबउँ। उ सबइ लोग बड़कवा दुट्ट अउर सक्तीसाली जोधा अहइँ। उ पचे अगवा बाढ़त भए सारी धरती पइ छाइ जइहीं। उ पचे ओन घरन अउ ओन सहरन पइ कब्जा कइ लेइहीं जउन ओनकर नहीं अहइँ। 7 बाबुल क लोग दूसर लोगन क ससाइ देइहीं। बाबुल क लोग जउन चइहीं, तउन करिहीं अउर जँहा चहिहीं, हुअँ जइहीं।

8 ओनकर घोड़न चीतन स भी तेज दउड़इवाला होइहीं अउर सूरज क लुकाइ जाइ क पाछे बड़का कूकुर स भी जियादा खूँखार होइहीं। ओनकर घोड़सवार फउजी सुदूर ठउरन स अइहीं। उ पचे आपन दुस्मनन पइ वइसे टूटि पड़िहीं जइसे अकासे स कउनो भूखा गिद्ध झपट्टा मारत ह। 9 उ पचे सबहिं हिंसा करइ बरे आइहीं। ओनकर फउज रेगिस्तान क हवा क तरह नाके क सोझ में अगवा बढ़िहीं। बाबुल क फउजी अनगिनत लोगन क बंदी बनाइके लइ जइहीं। ओनकर गिनती ऐतनी जियादा होई जेतनी रेत क कणन क होत ह।

10 “बाबुल क फउजी दूसर देसन क राजा लोगन क हँसी उड़इहीं। दूसर देसन क राजा ओनके बरे चुटकुला बन जइहीं। बाबुल क फउजी उँचा सुदूढ़ मीनारवाले सहरन पइ हँसिहीं। उ पचे ओन किलन क बदले में बालु क रास्ता बनाइके ओन सहरन क आसानी स हराइ देइहीं। 11 फुन उ पचे दूसर जगहन पइ जुद्ध बरे ओन जगहन क तजिके अइसेन ही

अगवा बढ़ि जइहीं जइसे आँधी आवति अहइ अउर अगवा बढ़ि जात ह। बाबुल क उ सबइ लोग बस आपन सक्ती क ही पूजिहीं।”

परमेस्सर स हबक्कूक क सवाल

12 फुन हबक्कूक कहेस, “हे यहोवा, तू अमर अहा। तू मोर पवितर परमेस्सर अहा। हम नहीं मरब। हे यहोवा, तू बाबुल क लोगन क दूसर लोगन क सजा देइ क रच्या ह। हे हमार चट्टान, तू ओनका यहूद क लोगन क सजा देइ क रच्या ह।

13 तोहार भली आँखिन कउनो दोख नहीं लखति हीं। तू पाप करत भए लोगन क नहीं लखि सकत ह। तउ तू ओन पापियन क जीत कइसे लख सकत ह? तू कइसे लख सकत ह कि सज्जन क दुर्जन हराइ देइ।

14 तू ही लोगन क अइसे बनाया ह जइसे सागरे क अनगिनत मछरियन जउन सागर छोटा जीव अहइँ बगइर कउनो मुखिया क।

15 दुस्मन हुक अउ जालि डाइके ओनका पकड़ि लेत ह। आपन जालि में फँसाइके दुस्मन ओनका हींच लइ जात ह। दुस्मन बहोत खुस होत ह जउन उ पकड़त ह।

16 इ फंद अउर जाल ओकरे बरे अइसी जिन्नगी में जउन धनवान क होत ह अउर उत्तिम भोजन खाइ में ओकर सहायक बनत हीं। एह बरे उ दुस्मन आपन ही जाल अउ फंदन क पूजत ह। उ ओनका मान देइ बरे सबइ बलि देत ह अउर उ ओनके बरे धूप बारत ह।

17 का उ आपन जाल स इहइ तरह लगातार पकड़त रहब? का बाबुल क फउज इहइ तरह निर्दय होइके जातियन क नास करत रहब?

2 “मई पहरे क मीनारे पइ जाइके खड़ा होबउँ। मई हुअँ आपन जगह लेब अउर रखवारी करब। मई इ लखइ क इंतजार करब कि उ मोसे का कहत ह। मई इंतजार करब अउर इ जान लेब कि मोरे सिकाइत क बारे में मोका का जवाब देइ चाही।”

परमेस्सर क जरिये हबक्कूक क सुनवाई

2 यहोवा मोका जवाब दिहस, “मई तोहका कछू देखावत हउँ, तू ओका लिख ल्या। सूचना पट्टी पइ एका साफ़-साफ़ लिख द्या ताकि लोग आसानी स ओका बाँचि सकइँ। 3 इ संदेस अगवा आवइवाला एक खास समइ क बारे में अहइ। इ संदेस आखिरी समइ क बारे में अहइ अउ इ सच्च सिद्ध होइ। अइसा लग सकत ह कि वइसा समइ तउ कबहुँ आइ हीं नहीं। मुला धीरा क संग ओकर इंतजार करा। उ समइ

आइ अउर ओका देर नहीं लागी। 4इ संदेस ओन लोगन क मदद नहीं कइ पाइ जउन एह पइ कान देइ स इनकार करत हीं। मुला सज्जन इ संदेस पइ बिस्सास करी अउर आपन बिस्सास क कारण सज्जन जिअत रही।”

5परमेस्सर कहेस, “दाखरस मनई क गुमराह कइ सकत ह। इहइ तरह कउनो सक्तीसाली मनई क ओकर घमण्ड मूरख बनाइ देत ह। उ मनई क सान्ति नहीं मिली। मउत क नाई कबहुँ ओकर पेट नहीं भरत उ हर समइ जियादा स जियादा इच्छा करत रहत ह अउर मउत क नाई ही ओका कबहुँ तृप्ति नहीं मिली। उ दूसर देसन क हरावत रही। उ दूसर देसन क ओन लोगन क आपन परजा बनावत रही। 6निहचय ही, इ सबइ लोग ओकर हँसी मसखरी उड़वत भए इ कहिहीं, ‘ओह पइ हाथ पड़इ जउन एतने दिनन तलक लूटत रहा ह। जउन अइसे ओन चिजियन क हथियावत रहा ह जउन ओकर नहीं रहिन। जउन केतने ही लोगन क आपन कर्जे क बोझे तरे दबावत रहा ह।’

7“का तू नहीं जानत कि उ सबइ जउन तोहका ऋण दिहेस ह तोहार खिलाफ उठिके खड़ा होइहीं? उ पचे उठिहीं अउर तोहका क कपाइहीं अउर उ तोहार चिजियन में स जउन कछू उ चाहत ह लेइ जाइहीं। 8तू बहोत स देसन क चिजियन लूट्या ह। तउ उ पचे तोहसे अउर जियादा लेइहीं। तू बहोत स लोगन क हत्तिया किहा ह। तू खेतन अउर सहरन क बर्बाद किहा ह। तू हुआँ सबहिँ लोगन क मार डया ह। 9सुना! जउन गलत तरीके स धन जमा किहेस ह! ओनका ओकर परिणाम भुगतइ क होइ। तू पचे सोचा करत ह कि तू आपन चिजियन चोरावइ स दूसर मनई क रोक सकत ह। मुला इ तोहार बरे बहोत बुरा होइ।

10“तू बहोत स लोगनक नास करइ क योजना बनाइ रख्या ह। ऐसे तोहार आपन लोगन ही लज्जित होइ अउर तोहका भी आपन जान स हाथ धोवइ क पड़ी। 11तोहरे घरे क देवारन क पाथर तोहरे खिलाफ गवाही देइहीं। हिआँ तलक कि तोहार घरे क छते क सहतीसन भी इ घोसणा करइहीं कि तू बुरा महई अहा। 12हाय लागइ उ बुरे अधिकारी पइ जउन खून बहाइके एक सहर क निर्माण करत ह अउर दुट्टता क जरिये चहारदीवारे स मिला एक ठु सहर क सुदृढ़ बनावत ह। 13सर्वसक्तीमान यहोवा इ ठान लिहस ह कि ओ लोग जउन कछू बनाए रहेन, उ सब कछू क एक ठु आगी भसम कइ देइ। ओनकर समूचा स्त्रम बेकार होइ जाइ। 14फुन सब कहुँ क लोग यहोवा क महिमा क जान जइहीं अउर एक खबर अइसे सँचर जाइ जइसे समुदरे में पानी फइला होइ। 15तू जउन आपन पड़ोसियन क दाखरस पिलावत ह, सुना! तू आपन जहर क मिलावत ह अउ ओका पिलावत ह ताकि तू ओकरे नग्नता क लखि सकी।

16“तू पचे सम्मान क जगह लज्जा स भरि जाब्या। तू पचे जरूर पीउब्या तउ तू पचे आपन नग्नता क प्रदर्शित करब्या। उ पियाले स पिआ जउन यहोवा क दाहिने हाथे में अहइ। तउ तू पचे सम्मान क जगह पई लज्जा पाउब्या।

17“लबानोन में तू बहोत स लोगन क हत्तिया किहा ह। तू हुआँ बहोत स गोरु लूट्या ह। तउ जउन लोग मारा गवा रहेन, तू ओनसे ससाइ जाब्या अउर तू उ देस बरे जउन बुरी

बातन किहेन, ओनके कारण तू डेराइ जाब्या। ओन सहरन क संग अउर ओन सहरन में बसइयन क संग जउन कछू तू किह्या ह, ओनसे तू डेराइ जाब्या।”

मूर्तियन क निरर्थकता क सँदिस

18ओकर इ लबार देवता, ओकर रच्छा नहीं कइ पाइ काहेकि उ तउ बस एक अइसी मूर्ति अहइ जेका कउनो मनई धातु स मढ़ दिहेस ह। उ सिरिफ एक ठु मूर्ति अहइ। एह बरे जउन मनई खुद ओका बनावत ह, ओसे मदद क अपेच्छा नहीं कइ सकत। उ मूर्ति तउ बोल तलक नहीं सकत। 19धिव्कार अहइ उ मनई क जउन एक ठु काठपुतरी स कहत ह- “ओ देवता, जागि उठा।” उ मनई क धिव्कार अहइ जउन एक ठु अइसी पाथर क मूर्ति स बोल तलक नहीं पावत, कहत ह, “ओ देवता, उठि बइठा।” काहे उ कछू बोली अउर ओका राह देखाइ। उ मूर्ति चाहे सोना स मढ़ी होइ, चाहे चाँदी स, मुला ओहमाँ परान तउ बाटइ ही नहीं।

20मुला यहोवा एहसे अलग अहइ। यहोवा अपने पवित्र मँदिर में रहत ह। एह बरे यहोवा क समन्वा संपूर्ण पृथ्वी क चुपचाप रहिके ओकरे बरे आदर परगट करइ चाही।

हबक्कूक क पराथना

3 हबक्कूक नबी बरे सिग्योनीत पराथना:

2हे यहोवा, मई तोहरे बारे में सुनेउँ ह। हे यहोवा, बीत गए समइ में जउन सक्ती स भरा कारज तू किहे ह, ओन पइ मोका अचंभा अहइ। अब मोर तोसे बिनती बाटइ कि हमरे समइ में तू फुन ओनसे बड़का कारज करा। मुला तू गुस्सा में भी हम पचन पइ दया क देखाउब सुमिरा।

3परमेस्सर तेमान कइँती स आवत अहइ। उ पवित्र परान क पहाड़े स आवत अहइ। ओकर महिमा आकासे क छाइ लेई। ओकर स्तुति धरती क भरि देइ।

4उ महिमा अइसी अहइ जइसे कउनो उज्जर जोति होइ। ओकरे हाथे स जोति क किरणन फूटति अहइँ अउर ओकरे हाथे में ओकर सक्ती लुकान अहइ।

5ओकरे समन्वा सबइ महामारी चलत हीं अउर ओकरे पाछे बिध्वंसक नास चला करत ह।

6यहोवा खड़ा भवा अउर धरती क निआव किहस। उ दूसर जातिन क लखेन अउर उ पचे काँपि उठेन। अतीत कालीन पहाड़न ढही गएन अउर चकनाचूर होइ गएन। पुरान बहोतइ पुरान पहाड़ ढहि गएन। परमेस्सर सदा अइसा ही करत ह।

7मई कुसान क तम्बुअन क दुःख में लखत ह। मिदयान क तम्बुअन क पर्दन काँपत रहेन।

8हे यहोवा, का तू नदियन पइ कोहान अहइ? का जलधारन पइ तोहका किरोध आवा ह? का समुदर तोहार किरोध क पात्र बन गवा? जब तू आपन बिजय क घोड़न पइ आवत रहा अउर विजय क रथन पइ चढ़ा रहा, का तू किरोध स भरा रह्या?

9तू आपन धनुस तान लिहा अउर तीरन आपन लच्छ क बेध दिहन। जल क धारन क चीरइ बरे फूट पड़िन।

10पहाड़न तोहका निहारेन अउर उ सबइ काँपि उठेन। जल धरती क फोरिके बहइ लाग। धरती स ऊँचा फव्वारा जोर स गर्जत भए फूटइ लागेन।

11सूरज अउ चाँद आपन प्रकास तजि दिहन। उ पचे जब तोहार भालन बिजुरी क तरह चमकत लखेन, तउ चमकब तजि दिहन। बिजुरियन क उ सबइ चमकन बिजुरियन अइसी रहिन जइसे भालन अउ तीरन हवा में लटकत अहई।

12तू धरती पइ किरोध में चलेन अउर तू आपन किरोध में जातियन क रौंद दिहेन।

13तू ही एक अहइ जउन आपन लोगन क बचावइ रहया। तू ही आपन चुना भए राजा क मार्गदर्सक रहया। तू प्रदेस क हर बुरा परिवारे क मुखिया लोगन क, सबन्त कम महत्व वाले मनई स लइके बहोत महत्व स भरा मनई तलक मार डया।

14दुस्मन क सिपाहियन हम लोगन क खिलाफ लइइ बरे सक्तीसाली आँधी क तरह आएन। उ पचे खुसी में सोचत रहेन क उ पचे एक बेसहारा मनई पइ हमला करइ क जइसा जब न कउनो एका लखत ह अउर न ही कउनो ओकरे मदद बरे आवत ह, क नाई हम लोगन क आसानी

स हरा सकत ह। मुला तू ओनका मूँडे क आपन भाला स छेद कइ दिहेन।

15मुला तू सागरे प आपन घोड़न पइ सवार होइके चलत रहया, सक्तीसाली जल क उत्तेजित कइ दिहया।

16मई इ सबइ बातन सुनेउँ अउर मोर पेट डर स काँपि उठी। जब मई इ आवाज़ क सुनेउँ, मोर होंठ काँपइ लागेन। मोर हड्डियन दुर्बल होइ गइन। मोर टाँगियन काँपइ लागिन। एह बरे मई बिनासे क दिन क बाट जोहब जउन ओन लोगन पइ आई जउन हम पई हमला किहेस।

यहोवा में सदा आनन्द स रहा

17अंजीर क बृच्छ चाहे अंजीर न उपजावई, अंगूरे क बेलन पइ चाहे अंगूर न उपजावई, जइतून क बृच्छ चाहे जइतून न पइदा करई, अउर चाहे इ सबइ खेत अनाज पइदा न करई, बाड़न में चाहे एक भी भेड़ न रहइ अउर चाहे पसुसाला में एक भी पसु न रहई।

18मुला फुन भी मई यहोवा में मगन रहबउँ। मई आपन रच्छक परमेस्सर में आनन्द लेबउँ।

19यहोवा, जउन मोर सुआमी अहइ। मोका सक्ती स भर दिहस ह। उ मोका हिरना क नाई पराइ में सहायता देत ह। उ मोका सुरच्छा क संग पहाड़न क ऊपर लइ जात ह।

संगीत निर्देसन बरे मोर तारदार उपकरण क संग।

License Agreement for Bible Texts

World Bible Translation Center

Last Updated: September 21, 2006

Copyright © 2006 by World Bible Translation Center

All rights reserved.

These Scriptures:

- Are copyrighted by World Bible Translation Center.
- Are not public domain.
- May not be altered or modified in any form.
- May not be sold or offered for sale in any form.
- May not be used for commercial purposes (including, but not limited to, use in advertising or Web banners used for the purpose of selling online ad space).
- May be distributed without modification in electronic form for non-commercial use. However, they may not be hosted on any kind of server (including a Web or ftp server) without written permission. A copy of this license (without modification) must also be included.
- May be quoted for any purpose, up to 1,000 verses, without written permission. However, the extent of quotation must not comprise a complete book nor should it amount to more than 50% of the work in which it is quoted. A copyright notice must appear on the title or copyright page using this pattern: "Taken from the HOLY BIBLE: EASY-TO-READ VERSION™ © 2006 by World Bible Translation Center, Inc. and used by permission." If the text quoted is from one of WBTC's non-English versions, the printed title of the actual text quoted will be substituted for "HOLY BIBLE: EASY-TO-READ VERSION™." The copyright notice must appear in English or be translated into another language. When quotations from WBTC's text are used in non-saleable media, such as church bulletins, orders of service, posters, transparencies or similar media, a complete copyright notice is not required, but the initials of the version (such as "ERV" for the Easy-to-Read Version™ in English) must appear at the end of each quotation.

Any use of these Scriptures other than those listed above is prohibited. For additional rights and permission for usage, such as the use of WBTC's text on a Web site, or for clarification of any of the above, please contact World Bible Translation Center in writing or by email at distribution@wbtc.com.

World Bible Translation Center

P.O. Box 820648

Fort Worth, Texas 76182, USA

Telephone: 1-817-595-1664

Toll-Free in US: 1-888-54-BIBLE

E-mail: info@wbtc.com

WBTC's web site – World Bible Translation Center's web site: <http://www.wbtc.org>

Order online – To order a copy of our texts online, go to: <http://www.wbtc.org>

Current license agreement – This license is subject to change without notice. The current license can be found at: <http://www.wbtc.org/downloads/biblelicense.htm>

Trouble viewing this file – If the text in this document does not display correctly, use Adobe Acrobat Reader 5.0 or higher. Download Adobe Acrobat Reader from: <http://www.adobe.com/products/acrobat/readstep2.html>

Viewing Chinese or Korean PDFs – To view the Chinese or Korean PDFs, it may be necessary to download the Chinese Simplified or Korean font pack from Adobe. Download the font packs from: <http://www.adobe.com/products/acrobat/acrrasianfontpack.html>